

**SESAMBUNGAN PARADHIGMATIK LAN SINTAGMATIKE TETEMBUNGAN SAJRONE TOTOHAN
ADU PITIK ING KECAMATAN KAUMAN KABUPATEN TULUNGAGUNG**

Danang Ragil Widyanarko

S-1 Jurusan Pendhidhikan Basa lan Sastra Dhaerah (Jawa), Fakultas Basa lan Seni, Universitas Negeri Surabaya
danangwidyanarko@mhs.unesa.ac.id

Drs. Sugeng Adipitoyo, M.Si

Dhosen Jurusan Pendhidhikan Basa lan Sastra Dhaerah (Jawa), Fakultas Basa lan Seni, Universitas Negeri Surabaya

ABSTRAK

Tetembungan minangka tembung kang nduweni teges tertamtu gumantung bidhange, kaya bidhang relasi sosial, pangupajawa, tetanen, pendhidhikan lan sapanunggale. Salah sawijine yaiku tetembungan ing relasi sosial masyarakat Jawa kang kalebu tumindak durjana miligine totohan adu pitik. Tetembungan kasebut sabanjure bakal digoleki sesambungan paradigmatik lan sintagmatike. Adhedhasar bab kasebut, undere panliten yaiku: (1) jinise sesambungan paradigmatike totohan adu pitik ing Kecamatan Kauman Kabupaten Tulungagung lan (2) jinise sesambungan sintagmatike tetembungan sajrone totohan adu pitik Kecamatan Kauman Kabupaten Tulungagung. Tujuwane panliten iki yaiku ngandharake lan njlentrehake sesambungan paradigmatik lan sintagmatike tetembungan sajrone totohan adu pitik ing Kecamatan Kauman Kabupaten Tulungagung.

Panliten iki kalebu jinis panliten linguistik dheskriptif kang asipat linguistik sinkronis. Dhatane awujud tetembungan sajrone totohan adu pitik Kecamatan Kauman Kabupaten Tulungagung. Banjur dhata kasebut digoleki jinis sesambungan paradigmatike. Sawise iku dijlentrehake kanthi jlentrehan perangane teges lan jlentrehan struktur batin kanggo nemtokake sesambungan sintagmatike. Asil panliten iki yaiku, tetembungan sajrone totohan adu pitik nduweni patang jinis sesambungan paradigmatik arupa hiponim, kohiponim, hipernim, lan kohipername. Asil panliten iki uga nuduhake yen sesambungan sintagmatik nduweni rong sipay yaiku enkapsulatif lan dhistributif.

Tembung wigati: sesambungan paradigmatik, sesambungan sintagmatik, tetembungan ing totohan adu pitik.

PURWAKA

Isine bab I iki (1) landhesane panliten, (2) punjere lan underane panliten, (3) tujuwane panliten, (4) paedaehe panliten, (5) watesane panliten, lan (6) pajlentrehe tetembungan.

Landhesane Panliten

Tetembungan (*istilah*) ing masyarakat Jawa akeh digunakake sajrone cecaturan. Tetembungan kasebut digunakake kanggo ngandharake sawijine bab ing bebrayan iki. Nalika nglakoni urip ing bebrayan manungsa dadi makluk sing ora bisa urip dhewe, tegese isih mbutuhake manungsa liyane. Ing bebrayan saben dina ora kabeh manungsa nglakoni tumindak kanthi apik kang trep tumrap susila, agama, lan ukum negara. Tumindak kasebut bisa wae kalebu tumindak durjana.

Panliten iki arep ngrembug bab tetembungan tumindak durjana totohan. Totohan yaiku nalika salah siji pawongan lan pawongan liyane nggawe janji yen sing menang oleh paweweh saka sing kalah, menang utawa kalah ora bisa di kira-kira amarga sipate totohan gumantung apik lan alane nasib, uga kaprigelane pawongan kasebut. Totohan ing bebrayan jaman saiki akeh banget wujude. Totohan bisa diperang dadi papat yaiku totohan adu kewan, totohan angka, totohan kertu,

totohan dhadhu. Perangan kapisan yaiku totohan adu kewan uga maneka warna, ana adu pitik, adu balap doro, adu balap jaran, adu wedhus, adu jangkrik.

Adu pitik banget anggone narik kawigaten panliti amarga adu pitik minangka tradhisi ing bebrayan Jawa sing wiwit nalika jaman Majapahit. Nanging, adu pitik ing bebrayan jaman saiki ngrembaka dadi totohan. Kajaba kuwi sing wigati sajrone totohan adu pitik akeh tetembungan sing durung digunanke lan dimangertenik kabeh masyarakat.

Tetembungan sajrone totohan adu pitik ing bebrayan akeh banget kayata ‘jiling, njalu, asor, apit, ganthol, unggul lan liya-liyane’. Tetembungan kasebut digunakake sajrone wong totohan adu pitik. Ora kabeh uwong mangertenik tetembungan kasebut, amarga tetembungan iku sengaja digawe sinandi. Tuladhané tetembungan ‘asor’ nduweni teges nalika pitik siji sing dianggep bakal kalah yen ditandhingake klawan mungsuhe amarga terus-terusan kenek jalu musuhe tanpa ana walesan, dene yen ing bausastra ‘asor’ nduweni teges nistha utawa ora luhur. Pambeda kasebut sing ndadekake tetembungan sajrone totohan adu pitik nduweni sipay mirungan lan manjila.

Adhedhasar andharan ing ndhuwur, mula panliti bakal ngandharake lan njlentrehake ngenani tetembungan

sajrone totohan adu pitik kanthi nggoleki sesambungan paradigmatik lan sintagmatik. Panliten ngenani sesambungan sintagmatik lan paradigmatik wis tau ana sadurunge, upamane panlitene Desiani (2016) ngenani "Sesambungan Paradigmatik lan Sintagmatik Leksikon ing Dolanan". Panliten iki nggunakake tintingan sing padha, nanging bakal nliti dhata-dhata tetembungan sajrone bidhang totohan adu pitik. Alasan milih topik iki amarga tetembungan sajrone totohan adu pitik nduweni tetembungan kang asipat mirungan lan manjila, uga panliti nduweni kekarepan supaya masyarakat mangertenai tetembungan kasebut. Saliyane kuwi, panliten ngenani tetembungan sajrone totohan adu pitik durung tau ditindakake sadurunge.

Adhedhasar andharan kasebut, panliti uga bakal nggunakake teori semantik leksikal kanthi ancangan TFDM (teori fitur distingtif makna). Cara nggunakake teori iki yaiku kanthi ndeleng sipayat sesambungan paradigmatik lan sintagmatik kanggo njlentrehake tetembungan sajrone totohan adu pitik. Sesambungan paradigmatik lan sintagmatik kasebut kalebu jinise relasi semantik leksikal lan gramatikal. Panliten iki dilaksanakake ing Kecamatan Kauman Kabupaten Tulungagung. Panggon kasebut dipilih amarga totohan adu pitik banget ngrembaka lan dianggep tumindak sing wis lumrah sing ditindakake karo wong lanang ing dhaerah kasebut. Kamangka umume ing bebrayan jawa totohan adu pitik kalebu tumindak durjana.

Dhata ing panliten iki awujud tetembungan sajrone bidhang sosial. Dhata kasebut sumbere saka tetembungan kang diucapake nalika ana totohan adu pitik ing kalangan adu pitik. Dene panggon panlitene ing Kecamatan Kauman Kabupaten Tulungagung. Menawa dhata, sumber dhata, lan lokasi dhata kasebut digandheng, panliten iki ngenani "Tetembungan sajrone Totohan adu pitik ing Masyarakat Kecamatan Kauman Kabupaten Tulungagung".

Punjer lan Underane Panliten

Adhedhasar lelandhesane panliten ing ndhuwur, punjere panliten iki yaiku sesambungan paradigmatik lan sintagmatik sajrone tetembungan ing totohan adu pitik. Saka punjer kasebut, underane panliten iki yaiku:

- 1) Apa wae jinise sipayat sesambungan paradigmatik tetembungan sajrone totohan adu pitik ing Kecamatan Kauman Kabupaten Tulungagung? lan
- 2) Apa wae jinise sesambungan sintagmatik tetembungan sajrone totohan adu pitik ing Kecamatan Kauman Kabupaten Tulungagung?

Tujuwane Panliten

Saka punjer lan underane panliten ing ndhuwur, tujuwan panliten iki yaiku kanggo ngandharake lan njlentrehake:

- 1) Jinise sipayat sesambungan paradigmatik tetembungan sajrone totohan adu pitik ing Kecamatan Kauman Kabupaten Tulungagung, lan
- 2) Jinise sipayat sesambungan sintagmatik tetembungan sajrone totohan adu pitik ing Kecamatan Kauman Kabupaten Tulungagung.

Paedahe Panliten

Saka tujuwane panliten kasebut bisa nuuhake paedah. Paedahe panliten iki diperang dadi loro yaiku paedah teoretis lan paedah praktis. Paedah teoretis lan paedah praktis kasebut bakal dicethakake ing ngisor iki.

Paedah Teoretis

Asil panliten iki bisa digunakake kanggo ngrembakakake teori ngenani tetembungan ing bidhang leksikografi. Dene ing bidhang semantik bisa ngrembakakake teori ngenani teges utawa makna ing relasi semantik mligine ngenani sesambungan paradigmatik (leksikal) lan sesambungan sintagmatik (gramatikal). Sabanjure panliten iki bisa nambahi panliten sing wis ana ngenani paradigmatik sintagmatike tetembungan.

Paedah Praktis

Asil panliten ngenani tetembungan sajrone totohan adu pitik sing ana ing bebrayan iki nduweni paedah praktis yaiku dikarepake bisa nambahi kawruh ngenani tetembungan-tetembungan sing ana ing bebrayan mligine ing Kecamatan Kauman Kabupaten Tulungagung. Menawa wis dingertenai ngenani tetembungan-tetembungan sajrone totohan adu pitik ing bebrayan dikarepake bisa dadi arsip dhaerah ngenani tetembungan sajrone totohan adu pitik ing masyarakat.

Watesane Panliten

Supaya ora kliwat kamban utawa nyimpang anggone nliti saka underan sing wis ditemtokake, mula perlu ana wewatesan sajrone ngandharake lan njlentrehake panliten iki. Watesane panliten iki ana loro, yaiku:

- 1) Dhata ing panliten iki awujud tetembungan sajrone totohan adu pitik ing Kecamatan Kauman Kabupaten Tulungagung lan
- 2) Tetembungan sajrone totohan adu pitik ing Kecamatan Kauman Kabupaten Tulungagung kasebut dijlentrehake kanthi cara ndeleng sesambungan paradigmatis lan sintagmatik.

Panjentrehe Tetembungan

Tetembungan sing dianggo ing panliten iki ana loro. Andharan jangkepe ing ngisor iki.

- 1) Tetembungan. Tetembungan yaiku tembung utawa gabungan tembung sing nduweni makna sing wis tetep, trep, pesthi, cetha lan mantep, sarta digunakake sajrone bidang kegiyatan ilmu tartamtu (Chaer, 2007: 19),
- 2) Pertimpangan sosial yaiku tumindak sing uwal saka norma-norma sosial lan pranatan sosial titikane yaiku anane tumindak *diasosiatif*. (Kartono, 2003:),
- 3) Totohan yaiku notohi kanthi senganja, notohake samubarang sing nduweni aji kanthi sadhar resiko lan pangira-ira sajrone kadadeyan tartamtu, adu, sayembara, lan kedadeyan-kedadeyan sing urung mesthi diweruhi asile. (Kartono, 2005: 58),
- 4) Sesambungan Paradigmatik yaiku sesambungan antarane perangan-perangan basa sajrone tataran tartamtu sing bisa diwolak-walik klawan unsur liyane. Sesambungan sing ana sajrone paradigmatik iki diarani sesambungan *in absensia*. (Kridalaksana, 2008: 86),
- 5) Sesambungan Sintagmatik yaiku sesambungan antarane perangan-perangan basa tartamtu sing wujude *linier* ing antarane unsur-unsur basa. Sesambungan sing ana sajrone sesambungan sintagmatik iki disebut sesambungan *in presetia*. (Kridalaksana, 2008: 86).

TINTINGAN KAPUSTAKAN

Isine bab II iki ngenani (1) panliten ngenani sesambungan paradigmatik lan sintagmatik, sarta tetembungan ing totohan adu pitik, (2) konsep-konsep kanggo panliten iki, lan (3) teori kango panliten iki.

Panliten ngenani Sesambungan Paradigmatik lan Sintagmatik, sarta Tetembungan ing Totohan Adu Pitik

Panlitene Panlitene ngenani tetembungan sajrone totohan adu pitik isih durung ana nanging cara njlentrehake kanthi ndeleng sipat paradigmatik lan sintagmatik tembung utawa leksikon iki wis tau ditliti. Upamane panliten sing dilaksanakake Desiani (2016), kanthi judhul "Sesambungan Paradigmatik lan Sintagmatik Leksikon ing Dolanan". Panliten kasebut kalebu panliten sing saemper karo panliten iki amarga panliten kasebut ngandharake ngenani sesambungan paradigmatik lan sintagmatik leksikon ing dolanan. Panliten kasebut dilaksanakake ing Blitar.

Panliten liyane upamane panlitene Putra, (2016) kanthi judhul "Sesambungan Sintagmatik sajrone Jenenge Bocah ing Kecamatan Saradaan Kabupaten Madiun kang Lair Taun 2010-2015". Sajrone panliten kasebut dhata-dhata jeneng bocah kasebut dijnjentrehake

kanthi ndeleng sesambungan sintagmatik jeneng kasebut. Panliten kasebut luwi nengenake apa wae jinise sesambungan sintagmatik asipat enkapsulatif lan jinise sesambungan sintagmatik asipat dhistributif sajrone jeneng bocah. Panliten kasebut dilaksanakake ing Kecamatan Saradaan Kabupaten Madiun.

Saliyane iku Utami, (2013) nglaksanakake panliten kanthi judhul "Set lan Kolokasi sajrone Upacara Panggih Penganten ing Kecamatan Berbek Kabupaten Nganjuk". Tujuwan saka panliten kasebut supaya dingerten igenani makna sajrone upacara panggih penganten ing Kecamatan Berbek Kabupaten Nganjuk. Panliten kasebut diandharake lan dinjlentrehake kanthi ndeleng sesambungan sipat paradigmatik lan sintagmatik set lan kolokasi tembung. Panliten Utami iki mung winates sajrone upacara panggih penganten ing Kecamatan Berbek Kabupaten Nganjuk.

Panliten sing dilaksanakake dening Chamidah, (2015) kanthi judhul "Set lan Kolokasi ngenani Cacade Awak" uga meh padha karo panliten iki. Sing ditliti saka cacade awak yaiku set lan kolokasine lan ndeleng sesambungan paradigmatik lan sintagmatik sajrone objek kasebut. Nanging, panliten kasebut winates objek, yaiku basa sing ditliti mung basa sing dienggo cecaturan masyarakat ing Desa Candipari Kecamatan Porong.

Panliten-panliten sing wis disebutake ing ndhuwur meh padha karo panliten sing arep dilaksanakake iki, nanging panliten iki tetep nduweni pambeda. Panliten sing dilaksakake dening Desiani (2016) dijnjentrehake nggunakake sipat sesambungan paradigmatik lan sintagmatik kasebut kanthi nggunakake leksikon ing dolanan minangka objeke. Semono uga Solikha (2016), sing uga njentrehake kanthi cara sing padha nanging ing kene sing ditliti yaiku meronimi. Panliten sing dilaksanakake dening Putra (2016) njlentrehake sesambungan sintagmatik jeneng.

Panliten-panliten ing ndhuwur bisa nyengkuyung panliten ngenani "Tetembungan sajrone adu pitik ing Kecamatan Kauman Kabupaten Tulungagung" iki. Punjer panliten iki yaiku sesambungan paradigmatik lan sintagmatik tetembungan sajrone adu pitik ing Kecamatan Kauman Kabupaten Tulungagung. Anane panliten iki bisa dimangerteni tetembungan ing adu pitik lan bisa diweruhi jinise sipat sesambungan paradigmatike.

Panliten iki meh padha karo panliten-panliten kang wis disebutake ing ndhuwur, nanging isih tetep ana pambedane. Dideleng saka bidhange, panlitene Utami ngenani set lan kolokasi upacara panggih penganten meh padha karo panliten iki yaiku padha-padha ing bidhang upacara, nanging panliten iki ngandharake ngenani tetembungan sajrone adu pitik. Antarane panliten iki karo panlitene Setiawan padha-padha ngandharake lan

njlentrehake sipate sesambungan paradigmatik wae nanging topik lan objeke beda. Panliten iki topike ngenani tetembungan lan objeke adu pitik, yen Setiawan ngenani set lan objeke solah bawane tangan. Panliten iki karo panlitene Chamidah uga beda, bedane ana ing topike. Panliten iki ngandharake ngenani tetembungan, yen panlitene Chamidah ngandharake ngenani set lan kolokasi. Topik panlitene Desiani padha karo panlitene Putra lan Mu'afidah yaiku ngenani leksikon, mula topik panliten iku beda karo topike panliten iki. Sipat sesambungan panlitene Desiani lan Mu'afidah padha padha ngandharake sesambungan paradigmatik lan sintagmatik, Putra mung ngandharake sipat sesambungan sintagmatik. Nanging panliten iki ngandharake sipat sesambungan paradigmatik lan sintagmatik ing tetembungan totohan adu pitik.

Konsep-Konsep Kanggo Panliten Iki

Konsep-konsep sajrone panliten iki diperang dadi loro yaiku sesambungan paradigmatik, lan tetembungan sajrone adu pitik. Supaya luwih cetha konsep-konsep kasebut diandharake ing ngisor iki.

Konsep ngenani Sesambungan Paradigmatik lan Sintagmatik

Andharan ngenani sesambungan paradigmatik lan sintagmatik ateges panliti uga ngrembung ngenani wilayah teges. Miturut Harimurti sajrone Chaer (2013: 110-111) wilayah teges yaiku bageyan saka sistem semantik basa sing nggambareke bageyan saka bidhang kabudayan utawa kanyatan sing ana ing jagad tartamtu sing diandharake dening unsur leksikal sing nduwени sesambungan.

Tembung utawa unsur leksikal makna sesambungan ing sabidhang tartamtu cacahe ora padha saka sabasa ing basa liyane. Andharan iki ana sambung rapete amarga sesambungan makna kasebut bisa dipengaruhi dening kamajuan lan kahanan budaya masyarakat basa ing dhaerah. Kayata tetembungan ‘ibu’, ‘bapak’, ‘anak’, ‘pakdhe’, ‘budhe’, ‘mbah’, ‘misanan’, lan ‘sapanunggale’. Tetembungan-tetembungan kasebut kalebu tetembungan sing nduweni makna sing sesambungan. Tetembungan sing ana ing sawilayah teges bisa digolongake dadi loro, yaiku golongan kolakasi lan golongan set.

Kolokasi nuduhake sesambungan sintagmatik lan set anane sesambungan paradigmatik. Sesambungan paradigmatik lan sintagmatik iku kekarone ngrembug ngenani perangan-perangan tataran basa tartamtu. Bedane sesambungan paradigmatik njlentrehake perangan basa tartamtu sing nduwени sipat in absensia. Yen ing sesambungan sintagmatik njlentrehake perangan basa tartamtu sing nduweni sipat in presentia.

Sesambungan Paradigmatik

Sesambungan paradigmatik yaiku sesambungan sing *berdimensi vertikal*, sesambungan antarane perangan basa sajrone pocapan. Perangan basa iki sing ana sajrone pocapan lan perangan basa sing ora ana sajrone pocapan. Perangan basa sing ora ana sajrone pocapan minangka perangan sing ‘diasosiasiakake’. Sesambungan kasebut bisa diarani relasi in absentia. Andharan ing kasebut kaya sing diandharake dening Oka lan Soeparno (1994:77).

Miturut Rahyono (2012:87) sesambungan paradigmatik yaiku sesambungan antarane leksikal sing bisa ngganteni unsur siji lan sijine minangka konstituen struktur ing panggon sing padha sajrone struktur. Yen miturute Kridalaksana (2008:86) sesambungan paradigmatik yaiku sesambungan antarane sawijine unsur sing bisa diwolak-walik sajrone tingkatan tartamtu. Saussere (sajrone Kurshatanti 2005:203) uga ngandharake bab sing meh padha, miturute sesambungan paradigmatik yaiku sesambungan antarane unsur-unsur sing ana sajrone tuturan lan nduwени gegayutan. Sesambungan paradigmatik bisa diwerahi kanthi cara nyulihii utawa komutasi.

Saka andharan para tokoh basa kasebut, bisa dimangerteni menawa sesambungan paradigmatik yaiku sesambungan sing ana antarane unsur sajrone tataran tartamtu sing bisa diwolak-walik. Bab sing bisa diwolak-walik kasebut yaiku perangan basa marang perang sing ana sanjabane. Sajrone sesambungan paradigmatik iki nduwени jinis lan sipat. Sabanjure bakal diandharake ngenani jinis sesambungan sing ana sajrone sesambungan paradigmatik.

Jinise Sesambungan Paradigmatik ing Tetembungan sajrone Totohan Adu Pitik

Sesambungan paradigmatik dipantha dadi loro yaiku idhentitas lan inklusi, eksklusi lan oposisi. Kaya sing diandharake dening Djajasudarma (2013: 112) perangan idhentitas lan inklusi dhewe diperang maneh dadi telu, yaiku hiponim. Meronim, lan sinonim. Adhedhasar andharan kasebut sesambungan paradigmatik sing ana ing kene yaiku hiponim. Miturut Oka lan Suparno (1994:247), ana rong komponen sajrone hiponim, yaiku kelas ndhuwur lan kelas ngisor. Kelas ndhuwur diarani hipernim kelas ngisor diarani kohiponim. Adharan ngenani komponen kasebut bakal diandharake ing ngisor iki.

Tegese Hiponim

Tembung utawa tetembungan digunakake kanthi mligi kanggo nuduhake aran, panggonan, utawa kadadeyan sing diwartakake. Panganggone tembung

nduweni makna sing jembar ing teges. Tembung-tembung sing dipilih diupayakake bisa dimangertenin dening panutur lan mitra tutur kanthi referen sing padha. Pamilihan tembung kasebut digunakake supaya ora ana teges liya ing mitra tutur.

Antarane tembung-tembung kasebut nduweni sesambungan yaiku hiponim lan hipernim. Hiponim yaiku sesambungan sawijine tembung saka tataran ngisor. Miturut Gudai (1989: 19) sesambungan hiponimi yaiku sesambungan antarane warga lan kelas utawa warga sing nyakup dadi siji. Chaer ngandharake anane tetembungan hiponimi uga meh padha karo meronimi. Bedane hiponim ngandharake makna tembung utawa tetebungan sing ana ing sawijine anggota saka tembung utawa tetembungan sing dadi hiponim kasebut.

Miturut Rahyono (2012: 145), hiponim yaiku sesambungan antar sing nuduhake sesambungan antara hierarki ndhuwur lan ngisor. Tembung ‘panganan’ kalebu superdinat sing nduweni ngisoran tembung liyane, yaiku tembung ‘panganan abot’ lan ‘panganan entheng’ sarta jinis-jinis panganan sing ana ing ngisor ‘panganan abot’ lan ‘panganan entheng’ iku mau. ‘Panganan abot’ lan ‘panganan entheng’ iku mau nduweni sesambungan kohiponim marang tembung ‘panganan’.

Kohiponim

Sesambungan antarane tembung siji lan kelas kang kalebu ing sajrone tembung liyane diarani sesambungan hiponim. Bisa dingertenin tembung “mawar” yaiku hiponim tumrap tembung “kembang”, utawa “mawar” yaiku anggota kelas “kembang”. Suwaliye bisa diandharake yen “mawar” hiponim tumrap “kenanga”, lan “kamboja” hiponim tumrap “mlati”. Sesambungan ing antarane “mawar”, “mlati”, lan “kenanga” yaiku sesambungan antar anggota kelas, sesambungan kaya mangkono diarani sesambungan kohiponim. (Ko- saka *co-* tegese “bebarengan”). Mula “mawar”, “mlati”, lan “kamboja” yaiku kohiponim. (Gudai, 1989:19). Saka andharan kasebut bisa didudut yen kohiponim yaiku sesambungan ing antarane tembung-tembung kang dadi anggota hiponim kang maknane dicakup dening tembung liya.

Tegese Hipernim

Miturut Chaer, (2009: 100) yen hiponim lan hipernim nuduhake anane kelas ndhuwur lan kelas ngisor, anane teges sing ana sajrone tembung manggon ing sangisore teges sajrone tembung liya, amarga ana tembung sing dadi hipernim lan liyane minangka hiponim.

Hipernim nuduhake anane sesambungan antarane kelas sing tansaya mendhuwur. Sesambungan saka anggota-anggota hiponim kelawan hiponim iku

dhewe sing bisa diarani hipernim. Tuladhané kaya sesambungan anatarane tetebungan ‘mantu’, ‘maratuwa’, ‘ipe’, lan ‘prepean’ marang tetembungan ‘batih’ sing minangka bageyan sing luwih rowa. Yen sesambungan ‘batih’ marang ‘mantu’, ‘maratuwa’, ‘ipe’, lan ‘prepean’ diarani hiponim. Mula, sesambungan ‘mantu’, ‘maratuwa’, ‘ipe’, lan ‘prepean’ marang bateh iki sing diarani hipernim.

Kohipernim

Kohipernim yaiku tetembungan kanggo nyebutake sesambungan antarane kelas ndhuwur. Kaya dene pepantane bangsa urip kang nduweni nyawa yaiku manungsa lan kewan. Manungsa bisa digolongake dadi lanang lan wadon. Dene kewan bisa digolongake dadi iwak, wedhus, sapi, jaran, lsp. Sesambungan antarane manungsa lan kewan kasebut diarani kohipernim amarga manungsa lan kewan minangka kelas ndhuwuran saka penggolongan kang luwih cilik.

Sipate Sesambungan Paradigmatik ing Tetembungan

Sesambungan paradigmatis bisa ditegesi sesambungan antarane perangan sing ana sajrone sawijine pacaturan karo sing ora ana sajrone pacaturan kasebut, bisa uga diarani sesambungan *in absensia* (Djajasudarma, 2003:110). Teges liya paradigmatis yaiku sesambungan makna *ekspresi* saka struktur tartamtu.

1. Netep

Miturut Oka lan Suparno, (1994: 81) Distribusi iku sipate komplementer lan sipat paralel. Distribusi sing ora substitutif utawa distribusi komplementer minangka perangan-perangan basa sing sesambungane ora bisa nyulihi tembung liyane, nanging bisa njangkepi siji lan sijine. Andharan ing ndhuwur bisa tegesi

2. Ora Netep

Miturut Oka lan Suparno, (1994:81) Distribusi sing substitutif utawa paralel, yaiku perangan-perangan basa sing sesambungane iku bisa nyulihi antarane siji lan sijine, saengga nuduhake sipat sesambungan paradigmatis sing ora netep.

Sesambungan Sintagmatik

Wujud tandha basa bisa dijilentrehake kanthi nintingi sesambungan *asosiatif*, yaiku sesambungan kang asipat paradigmatis lan sintagmatik (Saussure,1996:17). Sesambungan kang asipat sintagmatik yaiku sesambungan ing antarane perangan basa sajrone tataran *linier* utawa sejajar. Ateges sesambungan perangan basa kasebut ana ing sajrone tataran wicara, saora-orane bisa arupa frase lan ukara. Tuladhané ing frase, ‘manuk ngoceh’ lan ‘wedhus ngembek’. Frase kasebut antara

tembung siji lan sijine ana sambungan yaiku ‘manuk’ mesti ‘ngoceh’ lan ‘wedhus’ mesti ‘ngembek’. Sesambungan ing kasebut uwis ajeg, ora bisa dioahi maneh. Yen diowahi bakal ngowahi tegese. Tegese swarane ‘wedhus’ ora bisa ‘ngoceh’ lan ‘manuk’ ora bisa ‘ngembek’.

Panemune Sausure ing ndhuwur slaras karo panemune Kridalaksana. Miturut Kridalaksana (2008:223), sesambungan sintagmatik ngenani sesambungan *linier* antarane perangan-perangan basa sajrone tataran tartamtu. Tuladhane sesambungan antarane tembung dheweke, dolanan, lan bal. sesambungan kasebut diarani sesambungan *in presentia*.

Supriyarno uga nduweni panemu kang meh padha karo andharan ing ndhuwur. Miturut Supriyarno, sesambungan sintagmatik uga diarani *in presentia*, yaiku sesambungan antarane perangan-perangan kang ana sajrone pocapan kasebut kasusun kanthi urut, sipate *linier*.

Djajasudarma uga nduweni panemu ngenani sesambungan sintagmatik. Sesambungan sintagmatik yaiku sesambungan antarane perangan sajrone sawijine pocapan, mula saka kuwi diarani sesambungan *in presentia* (Djajasudarma, 2013:110). Sesambungan iki asipat *horizontal* utawa *linier*, ora ana ing saben tataran basa, jalaran alesan teges (logika semantik).

Adhedhasar andharan ing nduwur bisa dimangertenin yen sesambungan sintagmatik minangka sesambungan ing antarane perangan basa kang asipat *linier* utawa *sejajar* lan sesambungan sintagmatik iki ana sajrone tetembungan minangka perangan saka panganggone teges.

Jinise Sesambungan Sintagmatik ing Tetembungan

Sesambungan sintagmatik minangka sesambungan ing antarane perangan basa kang asipat *linier* utawa *sejajar* lan sesambungan sintagmatik iki ana sajrone tetembungan minangka perangan saka penganggone teges. Supaya luwih cetha ngenani jinise sipat sesambungan sinagmatik, bisa dideleng andharan ing ngisor iki.

1). Dhistribusi

Konsep dhistribusi minangka konsep kang linuwih sajrone tintingan struktural, jalaran saben-saben *klasifikasi* perangan basa iku adhedhasar konsep dhistribusi. Perera (2004:92) ngandharake yen makna struktural diwujudake sajrone sipate sesambungan sintagmatik perangan-perangan tembung kang mujudake ukara. Mula *klasifikasi* dhistribusi bisa digunakan kanggo ngandharake lan njlentrehake sipate sesambungan sintagmatik.

Saben perangan-perangan basa iku nduweni dhistribusi kang beda-beda. Miturut pamawase Oka lan Suparno (1994:81), dhistribusi iku bisa asipat *komplementer* lan *parallel*. Dhistribusi *komplementer* yaiku yen perangan-perangan basa kang sesambungan iku ora bisa nyilihi tembung liyane, nanging bisa njangkepi ing siji lan sijine. Dene dhistribusi *parallel* yaiku yen perangan-perangan basa kang sesambungan iku bisa nyulihi ing antarane siji lan sijine. Dhistribusi iki padha kaya kang dijlentrehake Lyons (1955:70-71) ngenani sipate dhistribusi yaiku dhistribusi *komplementer* lan dhistribusi *ekuivalen*. Arane dhistribusi *ekuivalen* padha karo dhistribusi *parallel*.

Saliyane iku, Lyons(1955:73) uga ngandharake yen saben-saben perangan basa nduweni *fungsi kontrastif* utawa *kombinatorial*, saengga luwih cethane yen ana rong perangan basa ora kontras, jalaran ana perangan saka basa kasebut kang padha dhistribusine. Mula perangan basa kang ana ing sajrone wilayah tartamtu, nanging ora kontras antarane siji lan sijine diarani *variasi bebas*. Sabanjure Lyons ngandharake yen *variasi bebas* ing fonologi lan semantik minangka *variasi bebas* (*ekuivalensi fungsi* sajrone konteks) lan *ekuivalensi* dhistribusi (ana ing deretan konteks kang padha).

2). Enkapsulasi

Enkapsulasi yaiku komponen makna saka *modifikasi* sintagmatik. Lyons (1977:262) ngandharake yen *modifikasi* sintagmatik iku saka tembung kang luwih umum utawa kanthi nggunakake tembung tunggal kang luwih mligi. Tuladhane tembung ‘mlarat’ kang tegese ‘wong kang bondha donyane ora akeh’ minangka sintagma saka [+manungsa] lan [-bandha]. Sabanjure ing babagan liya ing salah sawijine basa kang nggunakake tembung tunggal kang dikira-kira nduweni teges kang padha. Upamane tembung kriya ‘nyakot’ lan ‘ndilat’. Tembung ‘nyakot’ iku mesti nganggo untu lan ‘ndilat’ iku mesti nganggo ilat.

Adhedhasar andharan ing nduwur bisa dingertenin komponen tembung saka komponen *modifikasi* sintagmatik minangka enkapsulasi. Mula enkapsulasi rasa ‘untu’ mesti sesambungan karo ‘nyakot’ jalaran nyakot iku nganggo ‘untu’ lan enkapsulasi rasa ‘ilat’ sesambungan karo ‘ndilat’ jalaran ‘ndilat’ iku nganggo ‘ilat’.

Tegese Tetembungan sajrone Totohan Adu Pitik

Tetembungan ngandharake sawijine makna konsep, proses, kahanan, utawa sipat khas ing bidhang tertamtu (Panitia Pengembangan Bahasa Indonesia, Pusat Pembinaan dan Pengembangan Bahasa, 1975:9). Tetembungan tegese nduweni tujuwan ngandharake bab tertamtu gumantung bidhang. Bidhang tertamtu kasebut

ing antarane ana bidhang ilmu basa utawa kasusastran, psikologi, pendhidhikan, agama, kesenian, ekonomi, sosiologi, pertanian, kedokteran, lan sapanunggalane. Panliten ngenani tetembungan totohan adu pitik ing basa Jawa durung tau ditiliti, anane mung panliten ngenani leksikon.

Teori sajrone bidhang tetembungan dhewe ing basa Indonesia uga isih akeh kekurangane, apa maneh yen dibandhingake karo basa-basa mapan ing negara-negara sing wis maju. Dhasar kekurangan-kekurangane iku amarga (1) winatese cacah lan jinise tetembungan, ing antarane arupa tetembungan umum lan tetembungan mligi, (2) kurange wadah lan daya ucap ngenani tetembungan , (3) lajer kang dadi punjere isih durung pesthi, (4) tetembungan-tetembungan sing wis lajer durung ngrembaka ing masyakat, lan (5) maneka warna sikap sarta tumindak panganggo basa Indonesia tumrap tetembungan ing basa Indonesai. (Oka lan Muslich, 2010:95)

Miturut Chaer, 2007:88) tetembungan yaiku tembung lan klompok tembung kang tegese wis pesthi, sarta mung digunakake ing bidhang ilmu utawa kagiyatan tertamtu. Tetembungan ora bisa kawangun tanpa sebab kaya dene tembung. Tetembungan kudu kawujud kanthi sadhar dening para ahli ing bidhange dhewe-dhewe, amarga dheweke (para ahli iku) kang ngerti ngenani konsep-konsep keilmuan kang ana ing bidhange dhewe-dhewe.

Panitia Pengembangan Bahasa Indonesia, Pusat Pembinaan dan Pengembangan Bahasa (sajrone Oka lan Muslich 2010:92) ngandharake tetembungan yaiku tembung utawa gabungan tembung kang kanthi tliti ngandharake sawijine makna konsep, proses, kahanan, utawa sipat kang khas sajrone bidhang tertamtu. Tuladhane yaiku sikap, analisis, slaras, tuntas, tindak lanjut, ulang-alik, lan bebas konteks.

Adhedhasar panemune para ahli ing ndhuwur, tetembungan sajrone totohan adu pitikyaiku tembung, klompok tembung, lan frase kang nduweni teges pesthi kang ana sajrone totohan adu pitik. Tujuwan utamane pamujudan tetembungan yaiku aweh makna utawa konsep kang pas ing tembung utawa gabungan kang didadekake tetembungan iku.

Oka lan Muslich (2010:93-94) merang tetembungan dadi loro, yaiku tetembungan mligi lan tetembungan umum. Andharan kang luwih cetha kaya mangkene: (1) tetembungan mligi yaiku tetembungan kang dienggo ing sawijine bidhang ilmu lan teknologi tertamtu. Tetembungan-tetembungan kang mligi kudu dienggo ing bidhang buku pasinaon saka jenjang pendhidhikan sing luwih dhuwur; (2) tetembungan umum yaiku tetembungane minangka unsur basa umum.

Tetembungan umum iki sacara umum dienggo sajrone manekawerna bidhang panguripan.

Jinise Tetembungan sajrone Totohan Adu Pitik

Tetembungan nduweni titikan, (1) sipate monosemantis, yaiku sesambungan antarane wujud karo makna manggon sagaris lurus, (2) makna sawijine tetembungan mung bisa diganti karo definisi kang bisa digunakake ing bidhang ilmu lan kang nggunakake teknologi, (3) tetembungan kudu digunakake kanthi bebas konteks, (4) makna tetembungan asipat universal, lan (5) tetembungan umume saka golongan tembung aran, tembung kriya, lan tembung kahanan. Limang titikan iku kanggo mbedakake tetembungan supaya ora ana tembung utawa gabungan tembung kang ora klebu tetembungan.

Adhedhasar andharan ing ndhuwur bisa didudut yen tetembungan sajrone totohan adu pitik bisa diperang adhedhasar bidhange. Kanggo mujudake tetembungan sing pener lan trep karo kaidahe bisa dideleng saka titikane tetembungan. Tetembungan kasebut dijentrehake kaya dene andharane Oka lan Muslich kang mbedakake tetembungan adhedhasar bidhang tertamtu ing jlentrehan sesambungan paradigmatik.

Pamerange Tetembungan sajrone Totohan Adu Pitik

Adhedhasar jinise tetembungan ing ndhuwur, tetembungan sajrone panliten iki klebu jinis tetembungan mirungan lan manjila sajrone totohan adu pitik amarga tetembungan iki dhasare dijupuk saka panutur asli basa panggon tetembungan iku digunakake yaiku ing Kecamatan Kauman Kabupaten Tulungagung. Tetembungan sajrone totohan adu pitik diklompokake dadi telung golongan yaiku golongan titisiyaga, tililaksana, lan titipurna.

Teori kanggo Njlentrehake Panliten Iki

Teori sing bakal digunakake kanggo ngandharake jlentrehan ngenani tetembungan totohan adu pitik sajrone panliten iki yaiku nggunakake teori fitur dhistingtif. Teori fitur distingtif yaiku samubarang kang mbedakake antarane barang siji lan barang liyane. Teori fitur distingtif iki mengkone minangka lelandhesan kanggo ngonceki saben-saben dhata kang ana, kanthi nggunakake jlentrehan perangane teges utawa jlentrehan komponen makna *analisis komponen makna* lan jlentrehan struktur batin. Andharan luwih cethane ana ing ngisor iki.

Jlentrehan Struktur Batin

Jlentrehan struktur batin ngandharake makna sajrone tembung utawa tetembungan sing ora bisa oval saka andharan sesambungan makna tembung utawa

tetembungan sajrone ukara. Chomsky sajrone Gudai (1989:28-29) ngandharake yen jlentrehan struktur batin utawa *deep structure* yaiku kanggo ngandharake sesambungan makna sajrone tembung kang ora bisa uwal saka andharan sesambungan makna tembung ing sajrone ukara. Pamawase Chomsky kasebut slaras karo panemune Gudai (1989:28-29) kang ngandharake ngenani sesambungan makna leksikal lan makna gramatikal. Mula ana sesambungan karo andharan ngenani teori sintaksis lan semantik.

Panemune Gudai ing ndhuwur slaras karo panemune Kridalaksana (sajrone Oka lan Suparno, 1994:86) kang ngandharake yen struktur batin yaiku struktur kang dianggep dadi lelandhesane ukara utawa klompok tembung, kang ngandhut sakabehe *informasi* kang dibutuhake kanggo *interpretasi* sintaksis lan semantis ukara, lan kang ora nyata kanthi cara langsung saka *deret linier* ukara utawa klompok tembung kasebut.

Parera (2009:113) uga nduweni panemu yen *deep structure* utawa struktur batin minangka sakabehe guna gramatis lan sesambungan antarane perangan leksikal, kang bisa njlentrehake isine ukara kanthi semantis. Sajrone *deep structure* ditemokake 3 dhasar logika, yaiku: (1) pamerange kelas (leksikon), (2) pamerange sesambungan (sesambungan gramatikal antarane perangan-perangan saka leksikon), lan (3) pamerang sajrone guna.

Adhedhasar andharan para ahli basa ing ndhuwur bisa dingertenien yen jlentrehan struktur batin digunakake kanggo nuduhake sipate sesambungan sintagmatik. Sajrone jlentrehan struktur batin ana sesambungan antarane teori sintaksis lan semantik.

METODHENE PANLITEN

Jinise Panliten

Panliten kalebu panliten linguistik dheskriptif amarga sajrone panliten iki nliti sesambungan paradhigmatik lan sintagmatike tetembungan bab totohan adu pitik kanthi apa anane ing Kecamatan Kauman Kabupaten Tulungagung. Jinis panliten iki cundhuk karo andharane Pairin (2015) ngenani bab ragam basa kang uga kalebu jinis panliten linguistik.

Sipate Panliten

Panliten iki kalebu jinis panliten linguistik sinkronis amarga basa kang dienggo yaiku basa ing jaman saiki. Basa kang ditiliti sajrone panliten iki yaiku basa kang dituturake dening panutur ing Kecamatan Kauman Kabupaten Tulungagung ngenani totohan adu pitik.

Instrumen Panliten

Instrumen panliten iki kaperang dadi loro, yaiku nglumpukake dhata lan njlentrehake dhata. Nglumpukake dhata yaiku golek dhata tetembungan marang panutur kanthi nggunakake piranti kanggo nyatet kang arupa pulpen lan buku tulis, sarta piranti kanggo ngrekam swarane panutur kang arupa *handphone*. Dene nganalisis dhata yaiku njlentrehake lan ngandharake dhata nggunakake bagan, dhaftar, lan tabel.

Tatacara Nglumpukake Dhatane Panliten

Tatacara nglumpukake dhata ing panliten iki nggunakake metodhe semak lan metodhe cakap. Metodhe semak yaiku metodhe kang digunakake kanggo golek dhata kanthi cara nyemak panganggone basa (Mahsun, 2014:92). Metodhe semak bisa ditrapake kanthi saperangan teknik, yaiku teknik sadhap, teknik semak bebas libat cakap, lan teknik cathet. Andharan luwih cethane kaya mangkene (1) Teknik sadhap minangka teknik dhasar sajrone metodhe semak, amarga semak diwujudake kanthi cara nyadhap panganggone basa lan sawijine pawongan utawa pirang-pirang pawongan kang dadi narasumber (Mahsun, 2014:92); (2) Teknik semak bebas libat cakap yaiku panliti mung nyemak panganggone basa dening narasumber tanpa melu cecaturan; (3) Teknik cathet yaiku nyathet sakabehe wedharan nganggo piranti tulis banjur ditulis nggunakake lambang basa utawa aksara (Mahsun, 2014:131).

Luwih jangkepe tatacarane nglumpukake dhata diandharake kanthi urut yaiku (1) panliti nyiyapake pitakonan kang ana sesambungan karo tetembungan ing totohan adu pitik; (2) panliti nindakake wawancara banjur nyemak wangslane para narasumber; (3) panliti nyathet tetembungan ing totohan adu pitik minangka dhata panliten; (4) lan dhata kang kasil diklumpukake diperang adhedhasar pamerange tetembungan ing totohan adu pitik.

Tatacara Njlentrehake Dhatane Panliten

Anggone njlentrehake dhata yaiku nggunakake jlentrehan perangan teges lan jlentrehan struktur batin. Dhatane yaiku arupa tetembungan-tetembungan totohan adu pitik ing Kecamatan Kauman Kabupaten Tulungagung. Dhata kang arupa tetembungan-tetembungan sajrone sesambungan paradhigmatik sabanjure dijnjlentrehake adhedhasar hiponim, kohiponim, hipernim, lan kohipernim. Dene dhata sintagmatik dijnjlentrehake kanthi njlentrehan perangan tegesne. lan jlentrehan struktur batin, kang dhasare saka dhata paradhigmatik.

Salijane nggunakake perangan teges lan struktur batin, metodhe kang digunakake kanggo ngandharake lan njlentrehake jinise sipat sesambungan sintagmatik yaiku kanthi metodhe agih utawa metodhe dhistribusional.

Miturut Sudaryanto (1993:15) metodhe dhistribusional yaiku metodhe analisis dhata kang pirantine saka perangan basa iku dhewe dadi perangan kang nemtokake anasis. Metodhe dhistribusional kanggo mbuktekake jinise sipat sesambungan paradigmatik lan sintagmatik tetembungan sajrone totohan adu pitik.

Adhedhasar metodhe dhistribusional iku, teknik kang dianggep salaras lan bisa kanggo njlentrehake jinise sipat sesambungan sintagmatik tetembungan ing totohan adu pitik yaiku nggunakake teknik ganti. Teknik ganti yaiku teknik njlentrehake dhata kanthi cara ngganti unsur satuan basa nggunakake unsur satuan basa uga, yaiku unsur satuan basa pangganti (Sudaryanto, 1993:48). Teknik ganti nggunakake tandha centhang (✓) lan tandha (-). Tandha centhang (✓) kanggo nuduhake yen tembunge bisa ditampalan tandha (-) kanggo nuduhake yen tembunge ora bisa ditampa ing sawijine klompok pamerange totohan adu pitik.

JLENTREHAN DHATA LAN DHISKUSI ASILE PANLITEN

Isine bab IV iki, yaiku (1) andharan lan jlentrehan dhata, lan (2) asil panliten lan dhiskusi asil panliten. Luwi cethane ana ing ngisor iki.

4.1 Andharan lan Jlentrehan Dhata

Andharan lan jlentrehan dhata panliten iki dipantha dadi loro, yaiku (1) jinise sesambungan paradigmatik ing tetembungan sajrone totohan adu pitik lan (2) jinise sesambungan sintagmatik ing tetembungan sajrone totohan adu pitik. Tetembungan kang ana ing totohan adu pitik diandharake lan dijlentrehake ing ngisor iki.

4.1.1 Sesambungan Paradigmatik Tetembungan sajrone Totohan adu pitik

Sesambungan paradigmatik nduweni rong perangan yaiku adhedhasar jinis lan sipate sesambungan kasebut. Jinise sesambungan paradigmatik ana papat, yaiku hiponim, kohiponim, hipernim, lan kohipernim. Dene sipate ana loro yaiku netep lan ora netep. Kekarone padha-padha nduweni sesambungan, amarga sadurunge nemokake sipay netep lan ora netepe, luwi dhisik digoleki jinise sesambungan paradigmatik. Patang jinis sesambungan paradigmatik iku nduweni titikan dhewe-dhewe.

4.1.1.1 Sesambungan Paradigmatik Tetembungan sajrone Totohan adu pitik kang Arupa Hiponim

Jinise sesambungan paradigmatik kang kapisan yaiku hiponim. Hiponime tetembungan ing totohan adu pitik bisa digoleki saka titikane hiponim yaiku sesambungan antarane klas ngisor marang klas ndhuwur


utawa sesambungan antarane makna mligi marang makna umume tetembungan kang sipate ora bisa diwolak-walik. Sipate hiponim kang ora bisa diwolak-walik ateges sesambungane antarane klas ngisor marang klas ndhuwur mau ora bisa yen diwalik saka klas ndhuwur marang klas ngisor, nanging kudu saka klas ngisor marang klas ndhuwur. Saengga sesambungan hiponim iki digambarake kanthi tandha panah mandhuwur (↑).

1) Hiponim Tetembungan sajrone Titisiyaga

a. Hiponim Tetembungan sajrone Milih Pitik

Hiponim princen sajrone milih pitik tegese yaiku sesambungan antarane perangane milih pitik marang milih pitik dhewe. Saliyane iku hiponim princen sajrone milih pitik uga bisa diandharake sesambungan antarane peprincene bab totohan adu pitik marang milih pitik. Milih pitik dhewe tegese nemtokake pitik sing bakal dienggo totohan adu pitik, lan sing mungguhe pitike ora gampang kalahan. Mula saka kuwi milih pitik kalebu ing bageyane titisiyaga sing kawitan. Milih pitik diperang dadi telu kanggo nglompok-nglompokake tetembungan-tetembungane milih pitik. Hiponim sajrone milih pitik bisa dideleg ing bagan ngisor iki

**Bagan 4.7
Hiponim Milih Pitik**



- a) Bagan 4.7 ing ndhuwur nuduhake yen milih pitik diperang dadi telu, yaiku jinis pitik, katuranggan, lan ukur. Katelu perangan kasebut minangka dhasar kanggo nglompok-nglompokake tetembungan-tetembungane sajrone milih pitik. Saliyane iku, jinis pitik, katuranggan, lan ukur manggon ing sangsire milih pitik, saengga katelu perangan iku kalebu klas ngisor utawa superordinat. Dene milih pitik dhewe kalebu klas ndhuwur utawa subordinat amarga manggon ing sandhuwure jinis pitik, katuranggan, lan ukur. Sajrone bagan ing ndhuwur uga kawuwuhantandha panahe madhep mendhuwur kang ateges arahé saka ngisor nuju mendhuwur lan ora bisa diwolak-walik. Jlentrehan kasebut kalebu titikane hiponim. Mula saka kuwi bisa didudut yen jinis pitik, katuranggan, lan ukur minangka sesambungan hiponim marang milih pitik lan asipate searah saka ngisor mendhuwur kang ateges ora bisa diwolak-walik.

.

4.1.1.2 Sesambungan Paradigmatik Tetembungan sajrone Totohan adu pitik kang Arupa Kohiponim

Jinise sesambungan paradigmatik kang kapindho yaiku kohiponim. Kohiponime tetembungan ing totohan adu pitik bisa digoleki kanthi anane sesambungan saben anggota klase sing manggon ing sangisore superordinat sajrone totohan adu pitik. Sipate kohiponim iku wewalikan sing nduweni rong arah ngiwa nengen saengga sesambungan kohiponim iku digambarake kanthi tandha panah arah ngiwo nengen (\leftrightarrow).

1) Kohiponim Tetembungan sajrone Titisiyaga

a. Kohiponim Tetembungan sajrone Milih Pitik

Kohiponim tetembungane milih pitik bisa digoleki sesambungane saben anggota klase sing manggon ing sangisore klas ndhuwur utawa superordinat. Adhedhasar bagan 4.7 bisa diweruhi yen milih pitik diperang dadi telu, yaiku jinis pitik, katurangan, lan ukur. Telung perangan iku minangka peprincene totohan adu pitik kang kalebu ing milih pitik. Antarane telung peprincen iku diwenehi tandha panah ngiwa nengen (\leftrightarrow) kanggo nuduhake anane sesambungan kang arupa kohiponim, saliyane iku perangane iku kalebu klas ngisor saka milih pitik. Mula jinis pitik minangka kohiponime saka katurangan, dene katurangan kohiponim marang jinis pitik lan ukur, saengga ukur sesambungan kohiponim marang katurangan. Sangisore telung peprincen iku sish ana tetembungan-tetembungan kang uga nduweni sesambungan kohiponim. Supaya luwih cetha bisa dideleng andharan lan jlentrehane ing ngisor iku..


4.1.1.3 Sesambungan Paradigmatik Tetembungan sajrone Totohan adu pitik kang Arupa Hipernim

a. Hipernime Peprincen Milih Pitik

Hipernim princer sajrone milih pitik tegese yaiku sesambungan antarane milih pitik marang perangan kang luwih cilik saka nggawe utawa peprincene saka totohan adu pitik. Adhedhasar tatacarane, milih pitik diperang dadi telu yaiku jinis pitik, katurangan, lan ukur. Telung perangan iku minangka peprincene saka totohan adu pitik kang manggon ing sangisore milih pitik. Kayadene titikane hipernim yaiku sesambungan antarane klas ndhuwur marang klas ngisor lan arahe mengisor, saengga njalari milih pitik minangka hipernime saka jinis pitik, katurangan, lan ukur. Supaya luwih cetha bisa dideleng bagan ing ngisor iku.

Bagan 4.43

Hipernim Milih Pitik



Bagan 4.43 ing ndhuwur nuduhake anane sesambungan hipernim antarane milih pitik marang anggota klas sing manggon ing sangisore, yaiku jinis pitik, katurangan, lan ukur. Milih pitik minangka klas ndhuwur utawa superordinat minangka hipernime saka klas ngisore utawa subordinat yaiku jinis pitik, katurangan, lan ukur. Anane tandha panah mangisor (\downarrow) uga nuduhake yen antarane milih pitik marang perangan sangisore nduweni sesambungan hipernim. Saliyane iku uga kango nyethakake yen sesambungan hipernim mung saarah mangisor. Mula, bisa didudut yen sesambungan hipernim princer sajrone milih pitik kuwi sesambungan antarane milih pitik marang jinis pitik, katurangan, lan ukur kang manggon ing sangisore. Hipernim princer kang kalebu bab milih pitik wis diandharake lan dijlentrehake. Sabanjure bakal diandharake lan dijlentrehake hipernime princer sajrone bab jinis pitik.

4.1.1.4 Sesambungan Paradigmatik Tetembungan sajrone Totohan adu pitik kang Arupa Kohipernim

Sesambungan paradigmatis ing totohan adu pitik kang arupa kohipernim bisa dideleng saka tegese yaiku anane sesambungan ing antarane tetembungan-tetembungane totohan adu pitik kang dadi perangane kang gedhe saka makna sing ana ing klas ndhuwur. Sing dimaksud perangan gedhe yaiku superordinat. Sesambungan iku dititiki kanthi anane tandha panah (\rightarrow).

1) Kohipernim Tetembungan sajrone Milih Pitik

Jinis sesambungan paradigmatis kang arupa kohipernim sajrone milih pitik bisa dititiki kanthi cara nggoleki perangan sing dadi superordinate, amarga sesambungan kohipernim nuduhake anane sesambungan antarane klas ngisor sing nduweni perangan maneh. Saliyane iku sesambungan kohipernim sipate searah mengiwa. Luwih cethane bisa dideleng ing bagan ngisor iku.

Adhedhasar bagan 4.42 ing ndhuwur bisa diweruhi sajrone milih oitik nduweni telung perangan yaiku jinis pitik, katurangan lan ukur. telung tata cara iku digunakake kanggo nglompok-nglompokake tetembungane totohan adu pitik sing kalebu ing pepanahan milih pitik, saengga telung tata cara iku nduweni perangan luwih cilik maneh, tata cara iku bisa dadi superordinat saka perangan-perangane..

4.1.2 Sipate Sesambungan Sintagmatik Tetembungan sajrone Totohan adu pitik

Sesambungan sintagmatik yaiku sesambungan ing antarane satuan basa kang asipat linier utawa sajaran. Sipat-sipat sesambungan sintagmatik tetembungan sajrone totohan adu pitik ana loro, yaiku dhistributif lan enkapsulatif. Ana ing sesambungan sintagmatik tetembungan-tetembungan sajrone totohan adu pitik. Adhedhasar jinis sipat sesambungan sintagmatik, mula sipate sesambungan sintagmatik tetembungan sajrone totohan adu pitik diperang dadi loro yaiku (1) sipat enkapsulatif tetembungan sajrone totohan adu pitik lan (2) sipat dhistributife tetembungan sajrone totohan adu pitik. Kekarone sipat sesambungan sintagmatik kasebut dijentrehake ing ngisor iki.

4.1.2.1 Sipate Sesambungan Sintagmatik

Tetembungan sajrone Totohan adu pitik kang Arupa Enkapsulatif

Sipate sesambungan sintagmatik enkapsulatif ing perangan titisiyaga bisa diweruhi adhedhasar tetembungan kang sipate netep sajrone sesambungan paradigmatik. Tegese, tetembungan-tetembungan kasebut mung ana ing sawijine perangan titisiyaga lan ora ana ing perangan titisiyaga liyane.

Fitur dhistingtif makna yaiku cara kanggo mbedakake tetembungan kanthi ndeleng saka jlentrehan-jlentrehan teges sing ana ing njerone tetembungan kasebut. Jlentrehan teges kasebut sing mengko bisa dadi titikan sing luwih mligi kanggo negezi tetembungan sing ana. Luwih cethane bisa dideleng jlentrehan makna ing ngisor iki.

**Tabel 4.1
Drajat Pepadhan lan Drajat Bebedan
Tetembungan Titisiyaga Bab totohan adu pitik kang
Asipat Netep**

No.	Perangan Teges Tetembungan					DP	DB
		A	b	c	d		
1.	Magon	+	-	-	-	25 %	75%
2.	Wiring kuning	+	-	-	-	25 %	75%
3.	Wiring abang	+	-	-	-	25 %	75%
4.	Wiring galih	+	-	-	-	25 %	75%

Katrangan :

- a. Totohan adu pitik
- b. Totohan adu jangkrik
- c. Totohan balap dara
- d. Totohan balap jaran

Adhedhasar tabel 4.4 ing ndhuwur bisa dimangertenin yen tetembungan sajrone titisiyaga bab totohan adu pitik kang asipat netep iku nduweni drajat padhan (DP) lan

drajat bebedan (DB) , yaiku DP 25% lan DB 75%. DP lan DB kasebut diweruhi kanthi cara ngitung persentasene tandha tambah (+) lan tandha kurang (-). Tandha tambah (+) nuduhake yen tetembungan ana ing perangan teges tartamu. Dene tandha kurang (-) nuduhake yen tetembungan ora ana ing perangan teges tartamu. Carane ngitung persentase DP yaiku cacahe tandha tambah (+) dibage cacahe perangan teges banjur diping 100%. Dene ngitung persentase DB yaiku cacahe tandha kurang (-) dibage cacahe perangan teges banjur diping 100%. Cacahe perangan teges ing tabel ing ndhuwur ana papat yaiku totohan adu pitik, totohan adu jangkrik, totohan balap dara, totohan balap jaran. Patang perangan teges kasebut minangka fitur dhistingtif utawa fitur pembeda kanggo mbedakake tetembungan-tetembungan sajrone titisiyaga bab totohan adu pitik. Adhedhasar tabel ing ndhuwur bisa diweruhi yen tetembungan-tetembungan sajrone titisiyaga totohan adu pitik manggon ing perangan dhewe-dhewe. Mula, tetembungan kasebut diarani tetembungan asli, ateges tetembungan ana ing perangan dhewe-dhewe, ora bisa diganti karo tetembungan liyane.

Saka jlentrehan kasebut, banjur tetembungan kang asipat netep bisa ditegesi. Dene tegese tetembungan sajrone titisiyaga bab adu pitik kasebut dijentrehake ing ngisor iki.

(1) Magon

Magon yaiku tetembungan sajrone bidhang durjana wong Jawa subbidhang totohan adu pitik, kang kalebu pepantahan titilaksana minangka bageyan milih pitik lan princi jinis pitik , magon minangka salah siji jinis pitik asale saka campuran dhaerah Birma lan saigon sing dienggo totohan adu pitik.

(2) Wiring kuning

Wiring kuning yaiku tetembungan sajrone bidhang durjana wong jawa subbidhang totohan adu pitik, kang kalebu pepantahan titilaksana minangka bageyan milih pitik lan princi katuranggane pitik , wiring kuning minangka salah siji ules/ rupa pitik.

(3) Wiring abang

Wiring abang yaiku tetembungan sajrone bidhang durjana wong jawa subbidhang totohan adu pitik, kang kalebu pepantahan titilaksana minangka bageyan milih pitik lan princi katuranggane pitik , wiring abang minangka salah siji ules/ rupa pitik.

(4) Wiring galih

Wiring galih yaiku tetembungan sajrone bidhang durjana wong Jawa subbidhang totohan adu pitik, kang kalebu pepantahan titilaksana minangka bageyan milih pitik lan princi katuranggane pitik , wiring galih minangka salah siji ules/ rupa pitik

4.1.1.6 Sesambungan Semantis Sintagmatik kang Arupa Ora Netep

Sipate sesambungan semantis paradigmatik kang kapindho yaiku sesambungan semantis paradigmatik kang asipat ora netep. Tetembungan sajrone bidhang tartamtu kang nduweni sesambungan semantis paradigmatik kang ora netep iku nuduhake yen tetembungan kasebut dudu tetembungan asli saka bidhang tartamtu, saliyane iku, tetembungan iki bisa nyulihi tetembungan liyane. Sesambungan semantis paradigmatik kang asipat ora netep sajrone tetembungan bab totohan adu ana sesambungane utawa ana tetembungan padha-padha manggon ing tatalakune totohan kewan. Tetembungan sing asipat ora netep manggon ing bab totohan adu pitik lan bab liyane. Luwih gamblange ngenani babagan kasebut ana ing ngisor iki.

Tabel 4.3

Drajat Pepadhan lan Drajat Bebedan Tetembungan Bab Totohan Adu pitik Asipat Ora Netep

No.	Perangan teges	Tetembungan						DB
		A	b	c	d	E	DP	
1)	mbangkok	+	-	-	-	+	40%	60%
2)	birma	+	-	-	-	+	40%	60%
3)	pakoi	+	-	-	-	+	40%	60%
4)	pama	+	+	-	-	+	60%	40%

Katrangan:

- a. Totohan kewan
- b. Totohan angka
- c. Totohan kertu
- d. Totohan dhadhu
- e. Sanjabane bidhang totohan

Saka tabel 4.3 ing ndhuwur bisa dingertené yen tetembungan kang asipat ora netep sajrone titisiyaga, titilaksana lan titipurnane bab totohan adupitik iku ana pitungpuluw woluw. Jlentrehan fitur pambeda ing ndhuwur, banjur tetembungan kang asipat ora netep kasebut bisa ditegesi. Dene teges sajrone tetembungan totohan adu pitik dijlentrehake ing ngisor iki.

(1) Bangkok

bangkok yaiku tetembungan sajrone bidhang durjana wong Jawa subbidhang totohan adu pitik, kang kalebu pepanthan titilaksana minangka bageyan milih pitik lan princi jinis pitik, birma minangka salah siji jinis pitik asale saka Birma sing dienggo totohan adu pitik, tetembungan iki uga ana ing bidhang liyane nduweni drajat pepadhan (dp 40% lan db 60%).

(2) Birma

Birma yaiku tetembungan sajrone bidhang durjana wong Jawa subbidhang totohan adu pitik, kang kalebu pepanthan titilaksana minangka bageyan milih pitik lan princi jinis pitik, birma minangka salah siji jinis pitik asale saka Birma sing dienggo totohan adu pitik. tetembungan iki uga ana ing bidhang liyane nduweni drajat pepadhan (dp 40% lan db 60%)

(3) Pakoy

Pakoi yaiku tetembungan sajrone bidhang durjana wong Jawa subbidhang totohan adu pitik, kang kalebu pepanthan titilaksana minangka bageyan milih pitik lan princi jinis pitik, pakoi minangka salah siji jinis pitik sing dienggo totohan adu pitik. tetembungan iki uga ana ing bidhang liyane nduweni drajat pepadhan (dp 40% lan db 60%)

(4) Pama

Pama yaiku tetembungan sajrone bidhang durjana wong Jawa subbidhang totohan adu pitik, kang kalebu pepanthan titilaksana minangka bageyan milih pitik lan princi jinis pitik, pama minangka salah siji jinis pitik sing dienggo totohan adu pitik tetembungan iki uga ana ing bidhang liyane nduweni drajat pepadhan (dp 40% lan db 60%).

4.1.2.1 Sipate Sesambungan Sintagmatik Tetembungan sajrone Totohan Adu Pitik kang Arupa Enkapsulatif

Sesambungan sintagmatik kang asipat enkapsulatif yaiku komponen kang ana sajrone tetembungan saka komponen modifikasi sintagmatik. Asil analisis sipate sesambungan paradigmatik sadurunge, ana kang sipate netep kang ateges tetembungane ora bisa disulihie utawa mung ana ing sapanggonan. Mula tetembungan netep iku ing sesambungan sintagmatik bisa asipat enkapsulatif. Tetembungan sajrone totohan adu pitik kang asipat enkapsulatif bakal diandharake jangkep wiwit saka titisiyaga, titilaksana, lan titipurna Luwih cethane bisa dideleng ing andharan ngisor iki.

1) Enkasulapsine Tetembungan Titi Siyaga sajrone Totohan Adu Pitik

Sipate sesambungan sintagmatik enkapsulatif ing perangan titisiyaga bisa diweruhi adhedhasar tetembungan kang sipate netep sajrone sesambungan paradigmatik. Tegese, tetembungan-tetembungan kasebut mung ana ing sawijine perangan titisiyaga lan ora ana ing perangan titisiyaga totohan kewan liyane. Tetembungan-tetembungane titisiyaga sing asipat netep bakal disebutake lumantar dhaftar ing ngisor. Luwih cethane, bisa dideleng tabel ing ngisor iki.

Tabel 4.4

Tetembungan Titi Siyaga sajrone Totohan Adu Pitik kang Asipat Enkasulapsi

NO.	TETEMBUNGAN	BEDANE TETEMBUNGAN				TIPE MAKNA
		Totohan adu pitik	Totohan adu jangkrik	Totohan balap jaran	Totohan balap dara	
1.	Magon	✓	X	X	x	Jinise pitik
2.	Wiring kuning	✓	X	X	x	Ulese pitik
3.	Wiring abang	✓	X	X	x	Ulese pitik
4.	Wiring galih	✓	X	X	x	Ulese pitik
5.	Klawu bedhes	✓	X	X	x	Ulese pitik

Tabel iki nuduhake tetembungan sajrone totohan adu pitik kang asipat enkasulatif dibedakake adhedhasar jinise totohan kewan yaiku totohan adu pitik, totohan adu jangkrik, totohan balap dara, totohan balap jaran. Tetembungan cacahe suwidak papat kang asipat enkasulatif ing ndhuwur minangka enkasulatore. Tandha centhang sajrone tabel ing ndhuwur nuduhake yen tetembungan bisa ditampa. Saben tetembungan mung ana ing titisiyagane totohan adu pitik, amarga nuduhake yen enkasulator lan enkasulasine iku ora bisa disubtitusi. Yen salah sijine diganti tetembungan ora bisa ditampa. Mula saka kuwi, tetembungan kang ora bisa ditampa diwenehi tandha silang.

2) Enkasulapsine Tetembungan Titi Laksana sajrone Totohan Adu Pitik

Sipate sesambungan sintagmatik enkasulatif ing perangane tililaksanane totohan adu pitik bisa diweruhi adhedhasar tetembungan kang sipate netep sajrone sesambungan paradigmatik. Tegese, tetembungan-tetembungan kasebut mung ana ing sawijine perangane laksanane totohan adu pitik lan ora ana ing totohan kewan liyane. Tetembungan-tetembungan titisiyaga sing asipat netep bakal disebutake lumantar dhaftar ing ngisor. Luwih cethane, bisa dide leng tabel ing ngisor iki.

Tabel 4.5

Enkasulaptife Tetembungan Titi Laksana Sajrone Tetembungan Totohan Adu Pitik

NO.	TETEMBUNGAN	BEDANE TETEMBUNGAN				TIPE MAKNA
		Totohan adu pitik	Totohan adu jangkrik	Totohan balap jaran	Totohan balap dara	
1.	sikil ireng gangsal	✓	X	x	x	Pitungan rupane sikil
2.	sikil putih pitu	✓	X	x	x	Pitungan rupane sikil
3.	lurik ireng lima	✓	X	x	x	Pitungan rupane sikil
4.	sikil ijo lumut gangsal	✓	X	x	x	Pitungan rupane sikil

Tabel 4.5 nuduhake tetembungan sajrone totohan adu pitik kang asipat enkasulatif dibedakake adhedhasar jinise totohan kewan. Tetembungan cacahe patangpuluhanenem kang asipat enkasulatif ing ndhuwur minangka enkasulatore. Tandha centhang sajrone tabel ing ndhuwur nuduhake yen tetembungan bisa ditampa. Saben tetembungan mung ana ing titi laksasane totohan adu pitik, amarga nuduhake yen enkasulator lan enkasulasine iku ora bisa disubtitusi. Yen salah sijine diganti tetembungan ora bisa ditampa. Mula saka kuwi, tetembungan kang ora bisa ditampa diwenehi tandha silang.

Sesambungan semantik paradigmatik sajrone bab totohan adu pitik kang asipat netep wis dijentrehake. Sabanjure dijentrehake sesambungan semantis paradigmatik kang asipat ora netep ing ngisor iki.

4.1.2.2 Sesambungan Semantis Sintagmatik sajrone tetembungan Bab Totohan Adu Pitik kang Arupa Dhistributif

Jinise sesambungan semantis sintagmatik kang kapung pindho yaiku dhistributif. Dhistributif sajrone tetembungan bab totohan adu pitik bisa diweruhi saka tetembungan-tetembungan bab totohan adu pitik kang asipat ora netep ing sesambungan semantis paradigmatik. Tetembungan kang asipat ora netep kasebut ora mung ana ing sawijine perangan, nanging bisa kasebar ing pira-pira perangan. Dadi tetembungan kang asipat dhistributif iki bisa nyulihi tetembungan ing perangan liyane. Mula saka iku, dhasar kang dienggo

nggoleki perangane dhistributif iku yaiku asil persentase drajat pepadhane tetembungan kang asipat ora netep.

Carane nggoleki perangane dhistributif iku kanthi rumus $M+1SD \leq x$ kanggo nggoleki perangan dhuwur, lan $x < M-1SD$ kanggo nggoleki perangan endhek. Saka rumus kasebut diweruhi yen perangan dhistributif dhuwur iku nduweni persentase luwih utawa padha karo 80%, dene dhistributif endhek nduweni persentase kurang saka 60%. Saka andharan kasebut bisa diweruhi yen dhistributif bisa nduweni rong perangan dhuwur lan endhek. Andharan kang luwih jangkep ana ing ngisor iki

Tabel 4. 6
Dhistributife Tetembungan sajrone
Tetembungan Totohan Adu Pitik

NO .	TETEMBUNGA N	BEDANE TETEMBUNGAN					TIPE MAKNA
		Totohan kewan	Totohan angka	Totohan kertu	Totohan dhadhu	Sanjabane adu pitik	
1.	Mbangkok	✓	x	X	x	✓	Jinise pitik
2.	Birma	✓	x	X	x	✓	Jinise pitik
3.	Pakoi	✓	x	x	x	✓	Jinise pitik
4.	Pama	✓	✓	x	x	✓	Jinise pitik

Ing table iki wis diandharake tetembungan sajrone totohan adu pitik kang asipat dhistributif uga tipe maknane kanthi cara nitiki saka fitur dhistingtif yaiku totohan kewan, totohan angka, totohan kertu, totohan dhadhu lan sajabane bidhang totohan. Ing ngisor iki diandharake rong perangan dhistributif, yaiku (1) dhistributif dhuwur lan (2) dhsitributif endhek.

1. Dhistributif Dhuwur

Dhistributif dhuwur yaiku perangane dhistributif kang persentase drajad pepadhane iku akeh, yaiku luwih utawa padha karo 80% ($\geq 80\%$). Diarani dhistributif dhuwur amarga tetembungane nyebarenging luwih saka sabidhang, dadi tetembungan kang ana ing perangan teges iku luwih akeh. Tetembungan sajrone totohan adu pitik nduweni sesambungan dhistributif dhuwur yaiku, Kalah gandheng, rongatus, telungatus, limangatus, pitongatus, Sewu, sewu limangatus, rongewu kang nduweni drajat pepadhan sing padha 100% dene kalah gedhi nduweni drajat pepadhan 80%.

2. Dhistributif Endhek

Dhistributif endhek yaiku perangane dhistributif kang persentase drajad pepadhane iku sithik, yaiku kurang saka utawa padha karo 60% ($\leq 60\%$). Diarani dhistributif sithik amarga tetembungane ora sepira nyebarenging bidhang totohan lan bidgang litane, dadi tetembungan kang ana ing perangane teges iku mung sithik. Tetembungan sajrone bab totohan adu pitik kang nduweni sesambungan dhistributif endhek yaiku, pama, putih, pupu, gulu, suwiwi, kuku, driji, katul, kangkong, jagung, bathok, ember, spon, kurungan, umbaran, wedhi, pangkringan, pileg, ngebleki, banyu, ngadeg, kepala, ngadeg, lombok, bolah. Tetembungan kasebut nduweni drajat pepadhan 60%, lan tetembungan sing nduweni drajat pepadhan 40% yaiku mbangkok, birma, pakoi, bahu, gembel, sentrat, karak, beras abang, godhong kates, cepuk, banyu, trap, bubul, maniken, cacingen, kuning, dikoroki, dikileni, ember, spon, korok, ngalung, mranggal, nyucuk, ndlusup, badhan, tenggok, asor, unggul, ringgit, bongkar pasar, ngalung, kunir, kencur, gingseng, endhog, madu, parut, gombal, betadhin, ampisilin, pilkita, supertetra, dom jait.

Asil Panliten lan Dhiskusi Asil Panliten

Asil panliten diandharake adhedhasar andharan lan jlentrehane dhata ngenani sesambungan paradhigmatik lan sintagmatik tetembungan sajrone totohan adu pitik. Adhedhasar andharan lan jlentrehan kasebut bisa dingerten i yen tetembungan sajrone totohan adu pitik diklompokake dadi telung pepanthan adhedhasar tataurut adicarane totohan adupitik. Telung pepanthane totohan adu pitik yaiku titisiyaga, tililaksana, lan titipurna. Saben pepanthane nduweni tatacara lan tetembungan manggon ing princene tatacara kang dilaksanakake sajrone totohan adu pitik. Banjur tetembungan sajrone totohan adu pitik kasebut digoleki sifat sesambungan paradhigmatik lan sintagmatik. Tetembungan luwih dhisik digoleki jinis sesambungan paradhigmatik, yaiku hiper nim, kohiper nim, hiponim, lan kohiponim saengga bakal diweruhisipate sesambungan paradhigmatik yaiku netep lan ora netepe. Sarta sifat sesambungan sintagmatik yaiku enkapsulatif lan dhistributif.

Tetembungan sajrone totohan adu pitik ing kecamatan Kauman Kabupaten Tulungagung diklomopake dadi telung pepanthan adhedhasar tatacara totohan adu pitik yaiku titisiyaga, tililaksana, lan titipurna. Telung pepanthan kasebut nduweni sesambungan paradhigmatik lan sintagmatik. Jinis sesambungan paradhigmatik ing panliten iki ana 4 yaiku hiper nim, kohiper nim, hiponim, lan kohiponim. Saliyane iku sesambungan paradhigmatik uga nduweni sifat netep lan ora netep. Adhedhasar jinis sesambungan paradhigmatik,

bisa kango dhasar nggoleki tetembungan sajrone telung pepanthane totohan adu pitik kasebut kang asipat netep lan ora netep. Tetembungan sing ora bisa disubtitusekake lan mung ana utawa digunakake ing salah siji titisiyaga, tilaksana, utawa titipurna kalebu sipat netep. Dene tetembungan kang bisa disubtitusi ing sakabehe telung pepanthane totohan adu pitik diarani sipat ora netep. Dadi, tetembungan kang asipat netep ora bisa nyulihi tetembungan liya, dene tetembungan kang ora netep bisa nyulihi tetembungan saka bidhang liyane. Andharan sipat netep lan ora netep kasebut salaras karo panemune Oka lan Suparno (1994:81).

Tetembungan kang asipat netep sajrone titisiyaga ana 64 tetembungan. Tetembungan-tetembungan kasebut kasebar ana ing perangan-perangan adicarane titisiyaga yaiku milih jinis pitik, ngopeni pitik, jinis penyakit, njajal, njamoni. Banjur tetembungan kang asipat netep sajrone tilaksana ana 46 tetembungan. Tetembungan-tetembungan manggon ing perangan-perangan nggolek dina, totohan tarunge pitik. Tetembungan kang asipat netep sajrone titipurna ora ana amarga kalebu distribusi.

Saka rong pepanthan titisiyaga lan titi laksana nduwensi drajat bebedan sing padha yaiku 75%. Dadi cacahe tetembungan ing totohan adu pitik kang asipat netep sajrone sesambungan paradigmatik ana 110 tetembungan. Tetembungan kang asipat netep uga ora bisa ditemokake ing sakabehe jinis totohan kewan liyane, nanging among ana ing perangane totohan adu pitik.

Saliyane sipat netep, sesambungan paradigmatik tetembungan ing totohan adu pitik uga ana sipat ora netep. Cacahe tetembungan ing peprincene saben perangan yaiku ana 79 tetembungan. Tetembungan kang asipat ora netep iki kasebar ing bidhang totohan lan sanjabane bidhang totohan kanthi drajat pepadhan sing ora padha. Tetembungan kang nduwensi sipat ora netep minangka dhasar nemtokakae distributife tetembungan.

Sabanjure sesambungan sintagmatik tetembungan ing totohan adu pitik nduwensi sipat enkapsulatif lan dhistributif. Tetembungan kang asipat enkapsulatif kang salaras karo panemune Lyons (1977:262) yaiku tetembungan kang ora bisa disubtitusi. Sajrone sesambungan paradigmatik kalebu sipat kang netep, amarga tetembungan ora bisa didistribusekake lan ora bisa nyulihi tetembungan liya. Tetembungan kang asipat dhistributif yaiku tetembungan-tetembungan kang bisa disubtitusi. Sajrone sesambungan paradigmatik, tetembungan kang bisa disubtitusi yaiku tetembungan kang asipat ora netep, amarga tetembungan bisa didistribusekake lan bisa nyulihi tetembungan liya. Andharan kasebut cundhuk karo panemune Oka lan Suparno (1994:81). Saengga sajrone sesambungan sintagmatik cacahe tetembungan kang asipat enkapsulatif

padha karo cacehe tetembungan kang asipat netep ing telung pepanthane totohan adu pitik sajrone sesambungan paradigmatik. Semono uga cacahe tetembungan kang asipat dhistributif sajrone sesambungan sintagmatik padha karo cacahe tetembungan kang asipat ora netep sajrone sesambungan paradigmatik.

Panliten kang nduwensi sesambungan karo upacara adat Jawa wis tau diandharake Utami (2013) upacara adate yaiku upacara panggih penganten. Upacara panggih penganten anggone nliti ngenani jinise sipat sesambungan paradigmatik ing set lan jinise sipat sesambungan sintagmatik ing kolokasi. Set sajrone upacara panggih penganten diandharake adhedhasar platarane, jalaran plataran kasebut mujudake wilayah teges tembung kang nduwensi komponen makna. Mula andharan kasebut adhedhasar tilaksana, ubarampe, sarta piranti kang digunakake sajrone sajrone upacara panggih penganten. Saliyane iku konsep ngenani set uga sesambungan karo hiponim, hipernim, lan kohipernim. Dene anggone njlentrehake kolokasi kang nuduhake sipat sesambungan sintagmatik nggunakake struktur batin yaiku kanthi tataran ukara. Mula bisa weruhi bedane panliten iki karo panlitene Utami. Banjur anane panliten tetembungan sajrone totohan adu pitik adhedhasar pakaryane utawa tembung kriyane lan tembung aran kang manggon ing telung pepanthane totohan adu pitik iki supaya panliten-panlitene basa mliline tetembungan sajrone bidhang sistem kaperacayan subbidhang upacara adat sub-subbidhang upacara adat luwih maneka warna.

Panliten iki uga bisa ditandhingake karo panlitene Desiani (2016). Temane panliten iki memper karo temane Desiani yaiku sesambungan paradigmatik lan sintagmatik, nanging topike sing beda. Saliyane iku Desiani mung ngandharake rong jinis sesambungan paradigmatik yaiku hiponim lan hipernim. Mula saka kuwi panliten iki njangkepi panlitene Desiani kanthi ngandharake patang jinise sesambungan paradigmatik yaiku hiponim, kohiponim, hipernim, lan kohipernim.

Diskusi panliten

Adhedhasar dhiskusi ing ndhuwur bisa didudut yen tetembungan sajrone bidhang sistem tumindak durjanane manungsa subbidhang totohan sub-subbidhang totohan kewan jinise totohan adu pitik mliline ing Kecamatan Kauman Kabupaten Tulungagung nduwensi sesambungan paradigmatik lan sintagmatik. Jinise sesambungan paradigmatik tetembungan sajrone bidhang sistem tumindak durjana subbidhang totohan sub-subbidhang totohan kewan jinise totohan adu pitik ana 4, yaiku hipernim, kohipernim, hiponim, lan kohiponim. Lumantar konsep jinise sesambungan paradigmatik bisa dingertenipati tetembungan kang netep lan ora netep. Sabanjure jinise sesambungan sintagmatik tetembungan

sajrone bidhang tumindak durjana subbidhang totohan sub-subbidhang totohan kewan jinis totohan adu pitik ana 2, yaiku enkapsulatif lan dhistributif. Sipat enkapsulatif adhedhasar sipaye netepe tetembungan sajrone sesambungan paradhigmatik, dene tetembungan kang asipat dhistributif adhedhasar sipaye ora netepe sajrone sesambungan paradhigmatik.

PANUTUP

Isine bab V iki kaperang dadi loro, yaiku (1) dudutan lan (2) pamrayoga. Andharan luwih cethane ing ngisor iki.

Dudutan

Panliten ngenani tetembungan sajrone totohan adu pitik nuduhake anane tetembungan kang nduwensi sesambungan paradhigmatik lan sintagmatik. Adhedhasar sesambungan iku mula bisa dicethakne yen tetembungane kalebu jinis leksikologi semantik. Tetembungan-tetembungane diklompokake adhedhasar telung pepanthane totohan adu pitik yaiku titisiyaga, titilaksana, lan titipurna.

Tetembungan sajrone totohan adu pitik kabeh cacahé ana 188 tetembungan kang diklompokake miturut sipayat sesambungan paradhigmatik lan sintagmatik. Sadurunge digoleki sipayat sesambungan paradhigmatik luwih dhisik digoleki jinis sesambungan paradhigmatik yaiku hiponim, kohiponim, hipernim, lan kohipernim. Sajrone totohan adu pitik ana tetembungan asli lan ora asli adhedhasar sipayat netep lan ora netep sajrone sesambungan paradhigmatik.

Tetembungan kang asipat netep sajrone titisiyaga ana 64 tetembungan, saengga tetembungan kang asipat netep iku kalebu tetembungan kang asli sajrone totohan adu pitik. Banjur tetembungan kang asipat netep sajrone titilaksana ana 46 tetembungan, uga kalebu tetembungan asli kang ana ing totohan adu pitik. Ora ana tetembungan kang asipat netep sajrone titipurna, ateges uga ora ana tetembungan asli sajrone totohan adu pitik ing pepanthane titipurnane. Saengga sajrone totohan adu pitik nduwensi 110 tetembungan kang asli kang kasebar ing rong pepanthane totohan adu pitik. Dene sajrone totohan adu pitik nduwensi 78 tetembungan kang ora asli adhedhasar sipayat ora netepe totohan adu pitik sajrone sesambungan paradhigmatik kang uga kasebar ing telung pepanthane totohan adu pitik.

Pamrayoga

Panliten iki durung bisa njupuk sumbere teka ngendi ing tetembungan sing ora asli, sengaja ora ditliti amarga ngrasa pegg. Mula ing pangajab ana panlitin sing bisa njinggleng ing bab-bab iku. Prelu panliten sing mligi ngenani asal-usule tetembungan sajrone totohan adu pitik ing Kecamatan Kauman Kabupaten Tulungagung kang adhedhasar semantik leksikal mligine sesambungan paradhigmatik lan sintagmatik. Saliyané iku panliten iki uga mung nliti bab tetembungan sajrone totohan adu pitik ing Kecamatan Kauman Kabupaten Tulungagung. Mula diajab ing panliten sabanjure ana sing bisa nliti tetembungan totohan adu pitik sakabupaten Tulungagung lan nliti tetembungan ing bpidhang totohan liyane, supaya ttembungan ing bidhang totohan bisa mlebu ing kamus basa Jawa.

KAPUSTAKAN

- Adipitoyo, Sugeng. 2013. *Valensi Sintaksis Bahasa Jawa*. Surabaya: Citra Wacana.
- Aminuddin. 1998. *Semantik Pengantar Studi Tentang Makna*. Bandung: CV. Sinar Baru.
- _____. 2008. *Semantik Pengantar Studi Tentang Makna*. Bandung: Sinar Baru Algesindo Offset.
- Chaeer, Abdul. 1994. *LINGUISTIK UMUM*. Jakarta: RINEKA CIPTA.
- _____. 1995. *PENGANTAR SEMANTIK BAHASA INDONESIA*. Jakarta: RINEKA CIPTA.
- _____. 2002. *Pengantar Semantik Bahasa Indonesia*. Jakarta: RINEKA CIPTA.
- _____. 2007. *Linguistik Umum*. Jakarta: RINEKA CIPTA.
- _____. 2007. *Leksikologi & Leksikografi Indonesia*. Jakarta: Asdi Mahasatya.
- _____. 2009. *Pengantar Semantik Bahasa Indonesia*. Jakarta: Rineka Cipta.
- Chamidah, Nurul. 2015. "Set lan Kolokasi ngenani Cacade Awak". Skripsi ora diterbitake. Surabaya: JPBSD FBS Unesa.
- Cruse, D. Alan. 2004. *Meaning in Language: An Introduction to Semantics and Pragmatics*. Oxford: Oxford University Press.
- Desiani, Novi. 2016. "Sesambungan Paradhigmatik lan Sintagmatik Leksikon ing Dolanan". Skripsi ora diterbitake. Surabaya: JPBSD FBS Unesa.
- Djajasudharma, Fatimah. 1993. *Semantik 1: Pengantar ke Arah Ilmu Makna*. Bandung: ERESCO.
- _____. 1999. *Semantik 1: Pengantar ke Arah Ilmu Makna*. Bandung: Rafika Aditama.
- _____. 2013. *Semantik 2: Pemahaman Ilmu Makna*. Bandung: Rafika Aditama.

- Ginanjar, Bakdal dkk. 2013. *Dimensi dan Komponen Makna Medan Leksikal Verba Bahasa Indonesia yang Berciri (+Tindakan +Kepala +Manusia)*. *TransLing Journal: Translation and Linguistics*, 1, No 1, 65-75.
- Geoffreg, Leech. 1993. *Prinsip-prinsip Pragmatik*. Jakarta: Universitas Indonesia.
- Gudai, Darmansyah. 1989. *Semantik Beberapa Topik Utama*. Jakarta: Depdikbud.
- Geertz, Clifforrd. 2000. *Tafsir kebudayaan*. Yogyakarta: Penerbit Kansius
- Koentjaraningrat. 1981. *Sejarah Antropologi*. Jakarta: Bulan Bintang.
- _____. 1984) *Kebudayaan Jawa*. Jakarta: PN Balai Mustaka.
- Kridalaksana, Harimurti dan Bambang Kaswanti Purwo. “Linguistik Indonesia”. *Masyarakat Linguistik Indonesia tahun 4 No. 7 Juli 1986*.
- Kridalaksana, Harimurti. 2008. *Kamus Linguistik*. Jakarta:. Gramedia Pustaka Utama.
- Lyons, John. 1995. *Pengantar Teori Linguistik di Indonesia oleh I. Soetikno dari Introduction to Theoretical Linguistics*. Jakarta: Gramedia Pustaka Utama.
- _____. 1997. *Semantics: Volume 1*. Cambridge: Cambridge University Press.
- Mahsun. 2014. *Metode Penelitian Bahasa: Tahapan Strategi Metode dan Tehniknya*. Jakarta: Raja Grafindo Persada.
- atthews, P. H. 1997. *The Concise Oxford Dictionary of Linguistics*. Nw York: Oxford University Press.
- Mu’afida, Nurul .2016. “Sesambungan Paradigmatik lan Sintagmatik Leksikon ing Basa Jawa kang Ateges Tumindak”. Skripsi ora diterbitake
- Oka, I. G. N dan Suparno. 1994. *Linguistik Umum*. Jakarta: Departemen Pendidikan dan Kebudayaan.
- Parera, Jos Daniel. 1988. *SINTAKSIS*. Jakarta: Gramedia Pustaka Utama.
- _____. 1991. *Sintaksis Edisi Kedua*. Jakarta: Gramedia Pustaka Utama.
- _____. 2004. *Teori Semantik Edisi Kedua*. Jakarta: Erlangga.
- _____. 2009. *Dasar-Dasar Analisis Sintaksis*. Jakarta: Gelora Aksara Pratama.
- Pateda, Mansoer. 2001. *Semantik Leksikal Edisi Kedua*. Jakarta: Rineka Cipta.
- _____. 2010. *Semantik Leksikal*. Jakarta: Rineka Cipta.
- Rahyono, F. X. 2011. *Studi Makna*. Jakarta: Penaku.
- Samsuri. 1994. *Analisis Bahasa: Memahami Bahasa Secara Ilmiah*. Jakarta: Erlangga.
- Saussure, Ferdinand de. 1998. *Pengantar Linguistik Umum* Terjemahan Rahayu S. Hidayat. Yogyakarta: Gajah Mada University Press.
- Sudaryanto. 1991. *Tata Bahasa Baku*. Yogyakarta: Duta Wacana University Press.
- _____. 2015. *Metode lan Teknik Analisis Bahasa: Pengantar Penelitian Wahana Kebudayaan secara Linguistik*. Yogyakarta: Sanata Dharma University Press.
- Ullman, Steephon. 1997. (dadopsi oleh Sumarsono). *Pengantar Semantik*. Yogyakarta: Pustaka Pelajar.
- Wulandari, Badriyah. 2016. *Telaah Kehiponiman Verba Mencuri dalam Bahasa Indonesia*. *Jurnal Ilmiah Edukasi & Sosial*, 07,5-12.



NESA
Universitas Negeri Surabaya